



# CLEMENS PP. XIV.

AD PERPETUAM REI MEMORIAM.

**D**OMINUS, ac Redemptor noster JESUS CHRISTUS Princeps pacis a Propheta prænuntiatus, quod hunc in mundum veniens per angelos primum pastoribus significavit, ac demum per se ipsum, antequam in cœlos ascenderet, semel & iterum suis reliquit discipulis; ubi omnia Deo Patri reconciliavisset, pacificans per sanguinem crucis suæ, sive quæ in terris, sive quæ in cœlis sunt, Apostolis etiam reconciliationis tradidit ministerium, posuitque in eis verbum reconciliationis, ut legatione fungentes pro Christo, qui non est dissensionis Deus, sed pacis, & dilectionis, universo Orbi pacem annuntiarent. & ad id potissimum sua studia conferrent, ac labores, ut omnes in Christo geniti solliciti essent servare unitatem spiritus

A

6

tus in vinculo pacis, unum corpus, & unus spiritus, sicut vocati sunt in una spe vocationis ad quam nequaquam pertingitur, ut inquit S. Gregorius Magnus, si non ad eam unita cum proximis mente curratur.

Hoc ipsum potiori quadam ratione nobis divinitus traditum reconciliationis verbum, & ministerium, ubi primum, meritis prorsus imparibus, electi fuimus ad hanc Petri Sedem, in memoriam revocavimus, die, noctuque praec oculis habuimus, cordique altissime inscriptum gerentes, ei pro viribus satisfacere contendimus, divinam ad id opem assidue implorantes, ut cogitationes, & consilia pacis nobis, & universo dominico gregi Deus infundere dignaretur, ad eamque consequendam tutissimum nobis, firmissimumque aditum reserare. Quia vero probe scientes, divino nos consilio constitutos fuisse super gentes, & super regna, ut in excolenda vinea Sabaoth, conservandoque Christianæ Religionis ædificio, cuius Christus est angularis lapis, evellamus & destruamus, & disperdamus, & dissipemus, & ædificemus & plantemus. eo semper fuimus animo, constantique voluntate, ut quetadmodum pro Christianæ Reipublicæ quiete, & tranquillitate nihil a nobis præterminendum esse censuimus, quod plantando, ædificandoque esset quovis modo accommodatum; ita eodem mutuaæ charitatis vinculo expositulante, ad evellendum, destruendumque quidquid jucundissimum, etiam nobis esset, atque gratissimum, & quo carere minime possemus sine maxima animi molestia, & dolore, prompti æque essemus, atque parati.

Non est sane ambigendum, ea inter, quæ ad Catholicæ Reipublicæ bonum, felicitatemque comparandam plurimum conferunt, principem fere locum tribuendum

dum esse regularibus Ordinibus, ex quibus amplissimum in universam Christi Ecclesiam quavis ætate dimanavit ornamentum, præsidium, & utilitas. Hos idcirco Apostolica hæc Sedes approbavit non modo, suisque fulcita est auspiciis, verum etiam pluribus auxit beneficiis, exemptionibus, privilegiis, & facultatibus, ut ex his ad pietatem excolendam, & religionem, ad populorum mores verbo & exemplo rite informandos, ad fidei unitatem inter fideles servandam, confirmandamque, magis magisque excitarentur, atque inflammarentur. Ast ubi eo res devenit, ut ex aliquo regulari Ordine, vel non amplius uberrimi ii fructus, atque optatissima emolumenta a Christiano populo perciperentur, ad quæ afferenda fuerant primitus instituti, vel detimento potius esse visi fuerint, ac perturbandæ magis populorum tranquillitati, quam eidem procurandæ accommodati; hæc eadem Apostolica Sedes, quæ eisdem plantandis operam impenderat suam, suamque interposuerat auctoritatem, eos vel novis communire legibus, vel ad pristinam vivendi severitatem revocare, vel penitus etiam evellere, ac dissipare minime dubitavit.

Hac sane de causa Innocentius Papa III. prædecessor noster cum comperisset nimiam regularium Ordinum diversitatem gravem in Ecclesiam Dei confusionem inducere, in Concilio generali Lateranensi IV. firmiter prohibuit, ne quis de cetero novam Religionem inventiat; sed quicumque ad religionem converti voluerit, unam de approbatis assumat; decrevitque insuper, ut qui voluerit religiosam domum de novo fundare, regulam, & institutionem accipiat de approbatis. Uude

consequens fuit, ut non liceret omnino novam religionem instituere sine speciali Romani Pontificis licentia, & merito quidem, nam cum novæ Congregationes majoris perfectionis gratia instituantur, prius ab hac sancta Apostolica Sede ipsa vita futura forma examinari, & perpendi debet diligenter, ne sub specie majoris boni, & sanctioris vitae plurima in Ecclesia Dei incommoda, & fortasse etiam mala exoriantur.

Quamvis vero providentissime hæc fuerint ab Innocentio III. Prædecessore constituta, tamen postmodum non solum ab Apostolica Sede importuna petentium inhibatio aliquorum Ordinum Regularium approbationem extorsit, verum etiam nonnullorum præsumptuosa temeritas diversorum Ordinum præcipue mendicantium nondum approbatorum effrenatam quasi multitudinem adinvenit. Quibus plene cognitis, ut malo statim occurreret, Gregorius Papa X. pariter Prædecessor noster in generali Concilio Lugdunensi renovata Constitutione ipsius Innocentii III. Prædecessoris districtius inhibuit, ne aliquis de cetero novum Ordinem, aut religionem adinveniat, vel habitum novæ religionis assumat. Cunctas vero generaliter religiones, & Ordines mendicantes post Concilium Lateranense IV. adinventos, qui nullam confirmationem Sedis Apostolicæ meruerunt, perpetuo prohibuit. Confirmatos autem ab Apostolica Sede modo decrevit subsistere infrascripto: ut videlicet professoribus eorumdem Ordinum ita liceret in illis remanere, si voluerint, quod nullum deinceps ad eorum professionem admitterent, nec de novo domum, vel aliquem locum acquirerent, nec domos, seu loca, quæ habebant, alienare valerent sine ejusdem sanctæ Sedis licentia speciali.

Ea

V

Ea enim omnia dispositioni Sedis Apostolicæ reservavit in Terræ sanctæ subsidium , vel pauperum , vel alios pios usus per locorum ordinarios , vel eos , quibus Sedes ipsa commiserit , convertenda . Personis quoque ipsorum Ordinum omnino interdixit quoad extraneos prædicationis , & audiendi confessiones officium , aut etiam sepulturam . Declaravit tamen in hac Constitutione minime comprehensos esse Prædicatorum , & Minorum Ordines , quos evidens ex eis utilitas Ecclesiæ Universali proveniens prohibebat approbatos . Voluitque insuper Eremitarum S. Augustini , & Carmelitarum Ordines in solido statu permanere , ex eo quod istorum institutio prædictum generale Concilium Lateranense præcesserat . Demum singularibus personis Ordinum ; ad quos hæc Constitutio extendebatur , transeundi ad reliquos Ordines approbatos licentiam concessit generalem ; ita tamen ut nullus ordo ad alium , vel Conventus ad Conventum se , ac loca sua totaliter transferret , non obtenta prius speciali Sedis Apostolicæ licentia .

Hiscemet vestigiis secundum temporum circumstan-  
tias inhæserunt alii Romani Pontifices Prædecessores nostri ,  
quorum omnium decreta longum esset referre . Inter ceteros  
vero Clemens Papa V. pariter Prædecessor noster per suas sub  
plumbo 6. nonas Maii anno Incarnationis Dominicæ 1312. ex-  
peditas litteras Ordinem Militarem Templariorum nuncupato-  
rum , quamvis legitimate confirmatum , & alias de Christiana  
Republica adeo præclare meritum , ut a Sede Apostolica insig-  
nibus beneficiis , privilegiis , facultatibus , exemptionibus ,  
licentiis cumulatus fuerit , ob universalem diffamationem sup-  
pressit , & totaliter extinxit , etiamsi Concilium gene-

rale Viennense, cui negotium examinandum commiserat, a formalis, & definitiva ferenda sententia censuerit se abstinere.

Sanctus Pius V. similiter Prædecessor, noster, cuius insignem sanctitatem pie colit, & veneratur Ecclesia Catholica, Ordinem Regularem Fratrum Humiliatorum Concilio Lateranensi anteriorem, approbatumque a felicis recordationis Innocentio III. Honorio III, Gregorio IX. & Nicolao V. Romanis Pontificibus Prædecessoribus itidem nostris, ob inobedientiam decretis Apostolicis, discordias domesticas, & externas exortas, nullum omnino futuræ virtutis specimen ostendentem, & ex eo quia aliqui ejusdem Ordinis in necem S. Caroli S. R. E. Cardinalis Borromei Protectoris ac Visitatoris Apostolici dicti Ordinis scelerate conspiraverint, extinxit, ac penitus abolevit.

Recolendæ memoriæ Urbanus Papa VIII etiam Prædecessor noster per suas in simili forma Brevis die 6. Februarii 1626. expeditas litteras Congregationem Fratrum Conventualium Reformatorum a felicis memoriæ Sexto Papa V. itidem Præcessore nostro solemniter approbatam, & pluribus beneficiis, ac favoribus auctam, ex eo quia ex predictis Fratribus ii in Ecclesia Dei spirituales fructus non prodierint, imo quamplures differentiationes inter eosdem Fratres Conventuales Reformatos, ac Fratres Conventuales non reformatos ortæ fuerint, perpetuo supressit, ac extinxit: Domus, Conventus, loca, suppellectilem, bona, res, actiones, & jura ad predictam Congregationem spectantia Ordini Fratrum Minorum S. Francisci Conventualium concessit, & assig-

navit, exceptis tantum domo Neapolitana, & domo Sancti Antonii de Padua nuncupata de Urbe quam postremam Cameræ Apostolicæ applicavit, & incorporavit, suæque, suorumque successorum dispositioni reservavit: Fratribus denique prædictæ suppressæ Congregationis ad Fratres S. Francisci Cappuccinos, seu de Observantia nuncupatos transitum permisit.

Idem Urbanus Papa VIII. per alias suas in pari forma Brevis die 2. Decembris 1643. expeditas litteras Ordinem Regularem Sanctorum Ambrosii & Barnabæ ad nemus perpetuo suppressit, extinxit, & abolevit, subjecitque Regulares prædicti suppressi Ordinis jurisdictioni, & correctioni Ordinariorum locorum, prædictisque Regularibus licentiam concessit se transferendi ad alios Ordines regulares ab Apostolica Sede approbatos. Quam suppressionem rec. memoriae Innocentius Papa X. Prædecessor quoque noster solemniter per suas sub plumbo Kal. Aprilis anno incarnationis Dominicæ 1645. expeditas litteras confirmavit; & insuper Beneficia, Domus, & Monasteria prædicti Ordinis, quæ antea regularia erant, ad sacerdotiam reduxit ac imposterum sacerdotalia fore, & esse declaravit.

Idemque Innocentius X. Prædecessor per suas in simili forma Brevis die 16. Martii 1645. ob graves perturbationes excitatas inter regulares Ordinis Pauperum Matris Dei Scholarm Piarum, etsi Ordo ille prævio maturo examine a Gregorio Papa XV. Prædecessore nostro solemniter approbatus fuerit, præfatum regularem Ordinem in simplicem Congregationem, absque ullorum votorum emissione, ad instar Instituti Congregationis Presbyterorum sacerdotalium Oratorii in Ecclesia S. Mariæ in Vallicella de Urbe S. Philippi Neri nuncupatæ, reduxit:



## VIII



xit : Regularibus prædicti Ordinis sic reducti transitum ad quamcumque religionem approbatam concessit : admissionem Novitorum , & admisorum professionem interdixit : superioritatem denique , & jurisdictionem , quæ penes Ministrum generalem , Visitatores , aliosque Superiores residebat , in Ordinarios Locorum totaliter transtulit : quæ omnia per aliæ quot annos consecuta sunt effectum , donec tandem Sedes hæc Apostolica , cognita prædicti instituti utilitate , illum ad pristinam votorum solemnium formam revocavit , ac in perfectum regularem Ordinem redegit.

Per similes suas in pari forma Brevis die 29. Octobris 1650. expeditas litteras idem Innocentius X. Prædecessor ob discordias quoque & dissensiones exortas suppressit totaliter Ordinem S. Basilii de Armenis : Regulares prædicti suppressi Ordinis omnimode jurisdictioni , & obedientiæ Ordinariorum Locorum subjicit in habitu Clericorum sæcularium , assignata iisdem congrua sustentatione ex redditibus Conventuum suppressorum : illisque etiam facultatem transuendi ad quamcumque religionem approbatam concessit.

Pariter ipse Innocentius X. Prædecessor per alias suas in dicta forma Brevis die 22. Junii 1651. expeditas litteras attendens nullos spirituales fructus ex regulari Congregatione Presbyterorum Boni JESUS in Ecclesia sperari posse, præfatam Congregationem perpetuo extinxit : Regulares prædictos jurisdictioni Ordinariorum Locorum subjicit , assignata eisdem congrua sustentatione ex redditibus suppressæ Congregationis , & cum facultate transuendi ad quemlibet Ordinem regularem approbatum a Sede Apostolica ; suoque arbitrio reservavit applicatio-

mem.

nem bonorum prædictæ Congregationis in alios pios usus.  
 Denique felicis recordationis Clemens Papa IX.  
 Prædecessor itidem noster cum animadverteret, tres re-  
 gulares Ordines, Canonicorum videlicet regularium  
 Sancti Georgii in Alga nuncupatorum, Hieronymianorum  
 de Fesulis, ac tandem Jesuorum a Sancto Johanne Co-  
 lumbano institutorum parum, vel nihil utilitatis, & com-  
 modi Christiano populo afferre, aut sperare posse eos esse  
 aliquando allaturos, de iis suppressis, extinguendisque  
 consilium cepit, idque perfecit suis litteris in simili forma  
 Brevis die 6. Decembris 1668. expeditis; eorumque bona,  
 et redditus satis conspicuos, Venetorum Republica postu-  
 lante, in eos sumptus impendi voluit, qui ad Cretere  
 bellum adversus Turcas sustinendum erant necessario su-  
 beundi.

In his vero omnibus decernendis, perficiendisque  
 satius semper duxerunt Prædecessores nostri ea uti consultissi-  
 ma agendi ratione, quam ad intercludendum penitus aditum  
 animorum contentionibus, & ad quælibet amovenda diffi-  
 dia, vel partium studia magis conferre existimauit. Hinc  
 molesta illa, ac plena negotii prætermissa methodo, quæ in  
 forensibus instituendis iudiciis adhiberi consuevit, pruden-  
 tiæ legibus unice inhærentes, ea potestatis plenitudine, qua  
 tamquam Christi in terris Vicarii, ac supremi Christiani  
 Reipublicæ moderatores amplissime donati sunt, rem omnem  
 absolvendam curarunt, quin regularibus Ordinibus suppressi-  
 oni destinatis, veniam facerent, & facultatem sua expe-  
 riundi jura, & gravissimas illas vel propulsandi criminatio-  
 nes, vel causas amoliendi, ob quas ad illud consilii genus  
 suscipiendum adducebantur.

His igitur, aliisque maximi apud omnes ponderis, & auctoritatis exemplis nobis ante oculos propositis, vehementique simul flagrantes cupiditate, ut in ea, quam infra aperiemus, deliberatione, fidenti animo, tutoque pede incedamus, nihil diligentiae omisimus, & inquisitionis, ut quid ad regularis Ordinis, qui Societatis Jesu vulgo dicitur, originem pertinet, progressum, hodiernumque statum percutaremur; & compertum inde habuimus, eum ad animarum salutem, ad haereticorum, et maxime Infidelium conversionem, ad majus denique pietatis, & religionis incrementum a Sancto suo Conditore fuisse institutum; atque ad optatissimum hujusmodi finem facilius feliciusque consequendum, arctissimo Evangelicæ paupertatis voto tam in communi, quam in particulari fuisse Deo consecratum, exceptis tantummodo studiorum, seu litterarum Collegiis, quibus possidendi redditus ita facta est vis, & potestas, ut nihil tamen ex iis redditibus in ipsius Societatis commodum, utilitatem, ac usum impendi unquam poslit, atque converti.

His, aliisque Sanctissimis legibus probata primum fuit eadem Societas Jesu a rec: memorie Paulo Papa III. Praedecessore nostro per suas sub plumbo 5. Kal. Octobris anno Incarnationis Dominicæ 1540. expeditas litteras, ab eodemque concessa ei fuit facultas concedendi jura, atque statuta, quibus Societatis praesidio, incolumitati, atque regimini firmissime consuleretur. Et quamvis idem Paulus Praedecessor Societatem ipsam augustissimis sexaginta dumtaxat alumnorum limitibus ab initio circumscriptisset; per alias tamen suas itidem sub plumbo pridie Kal. Martii ann. Incarnationis Dominicæ 1543, expeditas litteras

locum dedit eadem in Societate iis omnibus, quos in eam excipere illius moderatoribus visum fuisset opportunitum, aut necessarium. Anno deinde 1549. suis in simili forma Brevis die 15. Novembris expeditis litteris idem Paulus Prædecessor pluribus, atque amplissimis privilegiis eandem Societatem donavit, ac in his indultum alias per eundem Præpositis generalibus dictæ Societatis concessum admittendi viginti Presbyteros Coadjutores spirituales, eisque impertinendi easdem facultates, gratiam, et auctoritatem, quibus Socii ipsi professi donantur, ad alios quoscumque, quos idoneos fore eidem Præpositi generales censuerint, ullo absque limite, & numero extendendum voluit, atque mandavit; ac præterea Societatem ipsam, & universos illius Socios, & personas illorumque bona quæcumque ab omni superioritate; jurisdictione, correctione quorumcumque Ordinariorum exemit, & vindicavit, ac sub sua, & Apostolicæ Sedis protectione suscepit.

Haud minor fuit reliquorum Prædecessorum nostrorum eamdem erga Societatem liberalitas, ac munificentia. Constat enim a rec. memoriae Julio III. Paulo IV. Pio IV. & V. Gregorio XIII. Sixto V. Gregorio XIV. Clemente VIII. Paulo V. Leone XI. Gregorio XV. Urbano VIII. aliisque Romanis Pontificibus privilegia eidem Societati jam antea tributa vel confirmata fuisse, vel novis aucta accessiōnibus, vel apertissime declarata. Ex ipso tamen Apostolica rum Constitutionem tenore, & verbis palam colligitur eadem in Societate suo fere ab initio varia dissidiorum, ac æmulationum semina pullulasse, ipsos non modo inter Socios, verum etiam cum aliis regularibus Ordinibus, Clero sæculari, Academiis, Universitatibus, publicis litterarum

gymnasiis, & cum ipsis etiam Principibus, quorum in distinctionibus Societas fuerat excepta ; easdemque contentiones, & dissidia excitata modo fuisse de votorum indole, & natura , de tempore admittendorum Sociorum ad vota, de facultate Socios expellendi, de iisdem Sociis ad sacros ordines promouendis sine congrua, ac sine votis solemnibus contra Concilii Tridentini, ac sanæ memoriae Pii Papæ V. Prædecessoris nostri decreta ; modo de absoluta potestate, quam Præpositus generalis ejusdem Societatis sibi vindicabat , ac de aliis rebus ipsius Societatis regimen spectantibus ; modo de variis doctrinæ capitibus, de scholis, de exemptionibus , & privilegiis, quæ Locorum Ordinarii , aliæque personæ in Ecclesiastica, vel sacerdotali dignitate constitutæ suæ noxia esse jurisdictioni , ac juribus contendebant ; ac demum minime defuerunt gravissimæ accusationes eisdem Sociis objectæ, quae Christianæ Reipublicæ pacem , ac tranquillitatem non parum perturbarunt.

Multæ hinc ortæ adversus Societatem querimoniae, quæ nonnullorum etiam Principum auctoritate munitæ ac relationibus ad rec. memorie Paulum IV. Pium V. & Sextum V. Prædecessores nostros delatae fuerunt. In his fuit claræ memorie Philippus II. Hispaniarum Rex Catholicus, qui tum gravissimas, quibus ille vehementer impellebatur rationes, tum etiam eos, quos ab Hispaniarum inquisitoribus adversus immoderata Societatis privilegia, ac regiminis formam acceperat clamores , et contentionum capita, nonnullis ejusdem etiam Societatis viris doctrina , & pietate spectatissimis confirmata, eidem Sixto V. Prædecessori exponenda curavit, apud eundemque egit, ut Apostolicam Societatis visitationem decerneret, atque committeret,

## XIII

Ipsius Philippi Regis petitionibus, & studiis, quae summa inniti æquitate animadverterat, annuit idem Sextus Pædecessor, delegitque ad Apostolici Visitatoris munus Episcopum prudentia, virtute, & doctrina omnibus commendatissimum; ac præterea congregationem designavit nonnullorum S. R. E. Cardinalium, qui ei rei perficiendæ sedulam navarent operam. Verum dicto Sixto V. Prædecessore immatura morte prærepto, saluberrimum ab eo suscepsum consilium evanuit, omnique caruit effectu. Ad supremum autem Apostolatus apicem assumptus felicis recordationis Gregorius PP. XIV. per suas litteras sub plumbo 4. Kal. Julii ann. Dominicæ Incarnationis 1591. expeditas, Societatis institutum amplissime iterum approbavit; rataque haberi jussit, ac firma privilegia quæcumque eidem Societati a suis Prædecessoribus collata; & illud præ ceteris quo cautum fuerat, ut a Societate expelli, dimittique possent Socii forma judiciaria minime adhibita, nulla scilicet præmissa inquisitione, nullis confectis actis, nullo ordine judiciario servato, nullisque terminis, etiam substantialibus servatis, sola facti veritate inspecta, culpæ, vel rationabilis causæ tantum ratione habita, ac personarum, aliarumque circumstantiarum. Altissimum insuper silentium imposuit; vertuitque sub pœna potissimum excommunicationis latæ sententiæ, ne quis dictæ Societatis Institutum, constitutiones, aut decreta directe, vel indirecte impugnare auderet, vel aliquid de iis quovis modo immutari curaret. Jus tamen cuilibet reliquit, ut quidquid addendum, minuendum, aut immutandum censeret sibi tantummodo, & Romanis solum Pontificibus pro tempore existentibus vel immedie, vel per Apostolicæ Sedis Legatos, seu Nuncios significare posset, atque proponere.

Tantum vero abest, ut hæc omnia satis fuerint compescendis adversus Societatem clamoribus, & querelis, quin potius magis, magisque universum fere Orbem pervalerunt molestissimæ contentiones de Societatis doctrina, quam fidei veluti Orthodoxæ, bonisque moribus repugnantem plurimi traduxerunt; domesticæ etiam, externæque effebuerunt dissensiones & frequentiores factæ sunt in eam, de nimia potissimum terrenorum honorum cupiditate accusationes; ex quibus omnibus suam hauserunt originem tum perturbationes illæ omnibus factis cognitæ, quæ Sedem Apostolicam ingenti mœstre affecerunt, ac molestia; tum capta a Principibus nonnullis in Societatem consilia. Quo factum est, ut eadem Societas novam Intituti sui, ac privilegiorum confirmationem a felicis recordationis Paulo Papa V. Prædecessore nostro impetratura, coacta fuerit ab eo petere, ut rata habere vellet, suaque confirmare auctoritate decreta quaedam in quinta generali Congregatione edita, atque ad verbum exscripta in suis sub plumbo, pridie non, Septembris anno Incarnationis Dominicæ 1606. desuper expeditis litteris; quibus in decretis discretissime legitur, tam internas Sociorum simultates, ac turbas, quam exterorum in Societatem querelas, ac postulationes Socios in comitiis congregatos impulisse ad sequens condendum statutum: „Quoniam Societas nostra, quæ ad fidei propagationem, & animarum lucra a Domino excita ta est, sicut per propria Instituti ministeria, quæ spiritualia arma sunt, cum Ecclesiæ utilitate, ac proximorum ædificatione sub crucis vexillo finem feliciter coensem, qui potest, quem intendit; ita & et hæc bona impediet &

„ & se maximis periculis exponeret, si ea tractaret, quæ  
 „ sacerdotalia sunt & ad res politicas, atque ad status guber-  
 „ nationem pertinent: idcirco Sapientissime a nostris majori-  
 „ bus statutum est, ut militantes Deo aliis quæ a nostra  
 „ professione abhorrent, non implicemur. Cum autem his  
 „ præsertim temporibus valde periculosis, pluribus locis, &  
 „ apud varios Principes ( quorum tamen amorem, & cha-  
 „ ritatem sanctæ memoriae Pater Ignatius conservandum ad  
 „ divinum obsequium pertinere putavit ) aliquorum fortasse  
 „ culpa, & vel ambitione, vel indiscreto zelo religio no-  
 „ stra male audiat; & alioquin bonus Christi odor necessa-  
 „ rius sit ad fructificandum; censuit Congregatio ab omni  
 „ specie mali abstinentiam esse, & querelis, quoad fieri  
 „ poterit, etiam ex falsis suspicionibus provenientibus, oc-  
 „ currendum. Quare præsenti decreto graviter, & severè,  
 „ nostris omnibus interdit, ne in hujusmodi publicis ne-  
 „ gotiis, etiam invitati, aut allesti ulla ratione se immisce-  
 „ ant, nec ullis precibus, aut suasionibus ab instituto de-  
 „ flectant. Et præterea quibus efficacioribus remediis omni-  
 „ no huic morbo, sicubi opus sit, medicina adhibeatur,  
 „ patribus Definitoribus accurate decernendum, & defi-  
 „ niendum commendavit. „

Maximo sane animi nostri dolore observavimus,  
 tam prædicta, quam alia complura deinceps adhibita reme-  
 dia nihil ferme virtutis præsetulisse, & auctoritatis ad tot,  
 ac tantas evellendas, dissipandasque turbas, accusationes,  
 & querimonias in sacerdotiam Societatem, frustraque ad  
 id laborasse ceteros Prædecessores nostros Urbanum VIII.  
 Clementem IX, X. XI. & XII. Alexanderum VII. &

& VIII. Innocentium X. XI. XII. & XIII. &  
Benedictum XIV. qui optatissimam conati sunt Ecclesiae  
restituere tranquillitatem plurimis saluberrimis editis con-  
stitutionibus; tam circa saecularia negotia, sive extra sacras  
Missiones, sive earum occasione minime exercenda, quam  
circa dissidia gravissima, ac jurgia adversus Locorum Ordini-  
arios, regulares Ordines, loca pia, atque communitates cu-  
jusvis generis in Europa, Asia & America non sine in-  
genti animarum ruina, ac populorum admiratione a Socie-  
tate acriter excitata; tum etiam super interpretatione, & praxi  
Ethnicorum quorundam rituum aliquibus in locis passim adhibi-  
ta, omissis iis, qui ab Universali Ecclesia sunt rite probati; vel  
super earum sententiarum usu, & interpretatione, quas  
Apostolica Sedes tamquam scandalosas, optimaque morum  
disciplinæ manifeste noxias inerito proscriptis; vel aliis de-  
mum super rebus maximi equidem momenti, & ad Chris-  
tianorum dogmatum puritatem sartam tectam servandam  
apprime necessariis, & ex quibus nostra hac non minus,  
quam superiori ætate plurima dimanarunt detimenta, & in-  
commoda; perturbationes nimirum, ac tumultus in nonnul-  
lis Catholicis regionibus; Ecclesiae persecutio[n]es in quibus  
dam Asiae, & Europæ provinciis; ingens denique allatus  
est mœror Prædecessoribus nostris, & in his piæ memorie  
Innocentio Papæ XI. qui necessitate compulsus eo devenit,  
ut Societati interdixerit novitios ad habitum admittere, tum  
Innocentio Papæ XII. qui eamdem poenam coactus fuit ei-  
dem comminari; ac tandem rec. memorie Benedicto  
Papæ XIV., qui visitationem Domorum, Collegiorum-  
que in ditione charissimi in Christo filii nostri Lusitanie,

## XVII

& Algarbiorum Regis Fidelissimi existentium censuit de-  
cernendam ; quia ullum subinde vel Sedi Apostolicæ sola-  
men , vel Societati auxilium , vel Christianæ Reipublicæ  
bonum acceperit ex novissimis Apostolicis litteris a felicis  
recordationis Clemente Papa XIII. immediato Prædecessore  
nostro extortis potius , ut verbo utamur a Prædecessore  
nostro Gregorio X. in supracitato Lugdunensi Oecumenico  
Concilio adhibito , quæm impetratis , quibus Societatis Jesu  
institutum magnopere commendatur ac rursus approbatur.

Post tot , tantasque procellas , ac tempestates a-  
cerbissimas futurum optimus quisque sperabat , ut optatissi-  
ma illa tandem aliquando illucsceret dies , quæ tranquil-  
litatem , & pacem esset cumulatissime allatura. At Petri  
Cathedram gubernante eodem Clemente XIII. Prædecessore  
longe difficiliora , ac turbulentiora acceperunt tempora. Aucti-  
tis enim quotidie magis in prædictam Societatem clamori-  
bus , & querelis , quinimo periculosissimis alicubi exor-  
tis seditionibus , tumultibus , dissidiis , & scandalis , quæ  
Christianæ charitatis vinculo labefactato , ac penitus disrup-  
to , fidelium animos ad partium studia , odia , & inimi-  
citas vehementer inflammavunt , eo discriminis , ac periculi-  
res perducta visa est , ut ii ipsi , quorum avita pietas ,  
ac in Societatem liberalitas hæreditario quodam veluti jure  
a majoribus accepta omnium fere linguis summopere com-  
mendatur , charissimi nempe in Christo Filii nostri Reges  
Francorum . Hispaniarum , Lusitanæ , ac utriusque Siciliæ  
suis ex Regnis , ditionibus , atque provinciis socios dimit-  
tere coacti omnino fuerint , & expellere ; hoc unum putantes  
extremum tot malis superesse remedium , & penitus ne-  
cessa.



## XVIII



cessarium ad impediendum, quominus Christiani populi in ipso Sanctæ Matris Ecclesiæ sinu se se invicem laceſſerent, provocarent, lacerarent.

Ratum vero habentes prædicti charifſimi in Christo Filii nostri remedium hoc firmum esse non posse, ac Universo Christiano Orbi reconciliando accommodatum, niſi Societas ipsa prorsus extingueretur, ac ex integro ſupprimetur; ſua idcirco apud præfatum Clementem PP. XIII. Prædeceſſorem exposuerunt ſtudia, ac voluntatem, & qua valebant auctoritate, & precibus, coniunctis ſimul votis expoftularunt, ut efficacijſima ea ratione perpetuæ ſuorum ſubditorum ſecuritati, univerſaque Christi Ecclesiæ bono proidentijſime conſuleret. Qui tamen præter omnium expectationem contigit ejusdem Pontificis obtus rei curſum, exitumque prorsus impeditivit. Hinc nobis in eadem Petri Cathedra, divina diſponente clementia, conſtitutis eadem ſtatim oblatæ ſunt preces, petiſſones, & vota, quibus ſua quoque addiderunt ſtudia, animique ſententiam Epifcopi complures, aliique viri dignitate, doctrina, religione pluriuum conſpicui.

Ut autem in re tam gravi, tantique momenti tu-  
tiffimum caperemus conſilium, diuturno Nobis temporis  
ſpatio opus eſſe judicavimus, non modo ut diligenter in-  
quirere, maturius expendere, & conſultijſime deliberare  
poſſemus, verum etiam ut multis gemitibus, & continuis  
precibus ſingulare a Patre luminum expoſceremus auxilium,  
& præſidium; qua etiam in re Fidelium omnium pre-  
cibus, pietatisque operibus nos ſæpius apud Deum juvari  
curavimus. Prescrutari inter cetera voluimus, quo inni-  
ta-

## XIX

tatur fundamento pervagata illa apud plurimos opinio, religionem scilicet Clericorum Societatis Jesu fuisse a Concilio Tridentino solemnni quadam ratione approbatam, & confirmatam; nihilque aliud de ea actum fuisse comperimus in citato Concilio, quam ut a generali illo exciperetur decreto, quo de reliquis regularibus Ordinibus cautum fuit, ut finito tempore novitiatus, novitii qui idonei inventi fuerint ad profitendum admittantur, aut a Monasterio ejificantur. Quamobrem eadem sancta Synodus ( Sess 25. c. 16. de Regular.) declaravit se nolle aliquid innovare, aut prohibere, quin praedicta religio Clericorum Societatis Jesu juxta pium eorum Institutum a Sancta Sede Apostolica approbatum, Domino, & ejus Ecclesiae inservire possit.

Tot itaque, ac tam necessariis adhibitis mediis, Divini Spiritus, ut confidimus, adjuti praesentia, & afflatus necnon munera nostri compulsi necessitate, quo & ad Christianae Reipublicae quietem, & tranquillitatem conciliandam, fovendam, roborandam, & ad illa omnia penitus de medio tollenda, quae eidem detimento vel minimo esse possunt, quantum vires simunt, arctissime adigimur; cumque præterea animadverterimus prædictam Societatem Jesu uberrimos illos amplissimosque fructus, & utilitates afferre amplius non posse, ad quos instituta fuit, a tot Prædecessoribus nostris approbata, ac plurimis ornata privilegiis, imo fieri, aut vix, aut nullo modo posse, ut ea incolume manente vera pax, ac diuturna Ecclesiae restituatur; his propterea gravissimis adducti causis, aliisque pressi rationibus, quas & prudentiae leges, & optimum Universalis Ecclesiae regimen nobis suppedierant, altaque

mente repositas servamus, vestigiis inharentes eorundem  
 Prædecessorum nostrorum, & præsertim memorati Grego-  
 rii X. Prædecessoris in generali Concilio Lugdunensi, cum  
 & nunc de Societate agatur, tum Instituti sui, tum privi-  
 legiorum etiam suorum ratione, Mendicantium Ordinum  
 numero ascripta, maturo consilio, & certa scientia &  
 plenitudine potestatis Apostolicæ fæpedictam Societatem  
 extinguimus, & supprimimus: tollimus, & abrogamus  
 omnia, & singula ejus officia, ministeria, & administra-  
 tiones, Domus, Scholas, Collegia, Hospitia, Grancias,  
 & loca quæcumque quavis in Provincia, Regno, & ditio-  
 ne existentia, & modo quolibet ad eam pertinentia; ejus  
 statuta, mores, consuetudines, Decreta, Constitutiones,  
 etiam juramento, confirmatione Apostolica, aut alias ro-  
 boratas; omnia item & singula privilegia, & indulta ge-  
 neralia, vel specialia, quorum tenores præsentibus, ac si  
 de verbo ad verbum essent inserta, ac etiamsi quibusvis formulis,  
 clausulis irritantibus, & quibuscumque vinculis, & decretis sint  
 concepta, proplene, & sufficienter expressis haberi volumus. Ideo-  
 que declaramus cassatam perpetuo manere, ac penitus extinctam  
 omnem, & quamcumque auctoritatem Præpositi Generalis,  
 Provincialium, Visitatorum aliorumque quorumlibet dictæ  
 Societatis Superiorum tam in spiritualibus, quam in tem-  
 poralibus; eamdemque jurisdictionem, & auctoritatem in  
 Locorum Ordinarios totaliter & omnimode transferimus jux-  
 tamodum, casus, & personas, & iis sub conditionibus, quas  
 infra explicabimus, prohibentes quemadmodum per præsen-  
 tes prohibemus, ne ullus amplius in dictam Societatem ex-  
 cipiatur, & ad habitum, ac novitiatum admittatur; qui  
 vero hactenus fuerunt excepti ad professionem votorum sim-

pli-

plicium, vel solemnium sub pena nullitatis admissionis, & professionis, aliisque arbitrio nostro, nullo modo admittū possint, & valeant. Quinimo volumus, præcipimus, & mandamus, ut qui nunc tyrocinio actu vacant, statim, illaco, immediate, & cum effectu dimittantur; ac similiter vetamus, ne qui votorum simplicium professionem emiserunt, nulloque sacro Ordine sunt usque adhuc initiati possint ad maiores ipsos Ordines promoveri pretextu, aut titulo vel jam emissæ in Societate professionis, vel privilegiorum contra Concilii Tridentini decreta eidem Societati collatorum.

Quoniam vero eo nostra tendunt studia, ut quemadmodum Ecclesiæ utilitatibus, ac populorum tranquillitati consulere cupimus; ita singulis ejusdem religionis individuis, seu sociis, quorum singulares personas paternæ in Domino diligimus, solamen aliquod, & auxilium afferre studeamus, ut ab omnibus, quibus hactenus vexati fuerunt contentionibus, dissidiis, & angoribus liberi fructuosius vineam Domini possint excolere, & animarum saluti uberius prodesse; ideo decernimus, & constituimus, ut socii professi votorum dumtaxat simplicium, & sacris Ordinibus nondum initiati, intra spatium temporis a Locorum Ordinariis definiendum, satis congruum ad munus aliquod, vel officium, vel benevolum receptorem inveniendum, non tamen uno anno longius a data præsentium nostrarum litterarum inchoandum, Domibus, & Collegiis ejusdem Societatis omni votorum simplicium vinculo soluti egredi omnino debeant, eam vivendi rationem suscepturn, quam singulorum vocationi, viribus, & con-

scientiæ magis aptam in Domino judicaverint ; cum & juxta Societatis privilegia dimitti ab ea hi poterant non alia de causa præter eam , quam Superiores prudentiæ , & circumstantiis magis conformem putarent , nulla præmissa citatione , nullis confectis actis , nulloque judiciario ordine servato.

Omnibus autem Sociis ad sacros Ordines promotois veniam facimus , ac potestatem , easdem domos , aut Collegia Societatis deferendi , vel ut ad aliquem ex regularibus Ordinibus a Sede Apostolica approbatis se conferrant , ubi probationis tempus a Concilio Tridentino præscriptum debebunt explere , si votorum simplicium professionem in Societate emiserint , si vero solemnium etiam votorum per sex tantum integros menses in probatione stabunt , super quo benigne cum eis dispensamus , vel ut in sæculo maneant tamquam Presbyteri , & Clerici Sæculares sub omnimoda , ac totali obedientia , & subjectione Ordinariorum , in quorum diœcesi domicilium figant ; decernentes insuper , vt his , qui hac ratione in sæculo manebunt congruum aliquod donec provisi aliunde non fuerint , assignetur stipendium ex redditibus domus , seu Collegii , ubi morabantur , habito tamen respectu tum reddituum tum onerum eidem annexorum.

Professi verò in sacris Ordinibus jam constituti , qui vel timore duci non satis honestæ sustentationis ex defectu vel inopia congruæ , vel quia loco carent , ubi domicilium sibi comparent , vel ob proiectam ætatem , infirmam valetudinem , aliasque justam , grauemque causam , do-



## XXIII



domus Societatis , seu Collegia derelinquere opportunum minime existimauerint , ibidem manere poterunt ea tamen lege , ut nullam prædictæ domus , seu Collegii administrationem habeant , Clericorum Sæcularium veste tantummodo utantur , vivantque Ordinario ejusdem loci plenissime subjecti . Prohibemus autem omnino , quominus in eorum qui deficiunt locum , alios sufficiant ; Domum de novo juxta Concilii Lugdunensis decreta seu aliquem Locum acquirant , Domos insuper , res , & loca , quæ nunc habent , alienare valeant ; quin imo in unam tantum Domum , seu plures , habita ratione Sociorum , qui remanebunt , poterint congregari , ita , ut Domus , quæ vacuae relinquuntur , possint in pios usus converti juxta id quod sacris canonibus voluntati fundatorum , divini cultus incremento , animarum saluti , ac publicæ utilitati videbitur suis loco , & tempore recte , riteque accommodatum . Interim vero vir aliquis ex Clero Sæculari prudentia , probisque moribus præditus designabitur , qui dictarum Domorum præsit regimini , deleto penitus , & suppresso nomine Societatis .

Declaramus individuos etiam prædictæ Societatis ex omnibus Provinciis , a quibus jam reperiuntur expulsi , comprehensos esse in hac generali Societatis suppressione ; ac proinde volumus . quod supradicti expulsi , etiamsi ad majores Ordines sint , & existant promoti , nisi ad alium regularem Ordinem transferint , ad statum Clericorum , & Presbyterorum Sæcularium ipso facto redigantur , & Loco- rum Ordinariis totaliter subjiciantur .

Locorum Ordinarii , si eam , qua opus est , deprehenderint virtutem , doctrinam , morumque integratem in iis qui e Regulari Societatis Jesu Instituto ad Pres-

by-

hyterorum Sæcularium statum in vim præsentium nostrarum litterarum transferint, poterunt eis pro suo arbitrio facultatem largiri, aut denegare excipiendi sacramentales confessiones Christi Fidelium, aut publicas ad populum habendi sacras conciones, sine qua licentia in scriptis nemo illorum iis fungi muneribus audebit. Hanc tamen facultatem uidem Episcopi, vel Locorum Ordinarii nunquam quoad extraneos iis concedent, qui in Collegiis, aut dominibus antea ad Societatem pertinentibus vitam ducent, quibus proinde perpetuo interdicimus Sacramentum pœnitentiæ extraneis administrare, vel prædicare, quemadmodum ipse etiam Gregorius X. Prædecessor in citato generali Concilio simili modo prohibuit. Qua de re ipsorum Episcoporum oneramus conscientiam, quos memores cupimus severissimæ illius rationis; quam de ovibus eorum curæ commissis Deo sunt reddituri, & durissimi etiam illius judicii, quod iis, qui presunt, supremus vivorum, & mortuorum Judex minatur.

Volumus præterea, quod si quis eorum, qui Societatis institutum profitebantur, munus exerceat erudiendi in litteris juventutem aut Magistrum agat in aliquo Collegio, aut schola, remotis penitus omnibus a regimine administratione, & gubernio, iis tantum in docendi munere locus fiat perseverandi, & potestas, qui ad bene de suis laboribus sperandum signum aliquod præferant, & dummodo ab illis alienos se præbeant disputationibus, & doctrinæ capitibus, quæ sua vel laxitate, vel inanitate gravissimas contentiones, & incommoda parere solent, & procreare; nec ullo unquam tempore ad hujusmodi docendi munus ii admittantur, vel in eo, si nunc actu versantur, suam



suam finantur praestare operam , qui scholarum quietem , ac publicam tranquillitatem sunt pro viribus conservaturi.

Quod vero ad sacras attinet missiones , quarum etiam ratione intelligenda volumus quæcumque de Societatis suppressione disposuimus , nobis reservamus , ea media constituere , quibus & Infidelium conversio , & dissidiorum sedatio facilius , & firmius obtineri possit , & comparari ,

Cassatis autem , & penitus abrogatis , ut supra , privilegiis quibuscumque , & statutis fæpedictæ Societatis declaramus ejus Socios , ubi a Domibus , & Collegiis Societatis egressi , & ad statum Clericorum Sæcularium redacti fuerint , habiles esse , & idoneos ad obtainenda juxta sanctorum canonum , & constitutionum Apostolicarum decreta , Beneficia quæcumque tam sine cura quam cum cura , Officia , Dignitates , Personatus , & id genus alia , ad quæ omnia eis in Societate manentibus aditus fuerat penitus interclusus a felicis recordationis Gregorio PP. XIII. per suas in simili forma Brevis die 10. Septembris 1584. expeditas litteras , quarum initium est : *Satis , superque.* Item iisdem permittimus , quod pariter vetitum eis erat , ut eleemosynam pro Missæ celebratione valeant percipere ; possintque iis omnibus frui gratiis , & favoribus , quibus tamquam Clerici Regulares Societatis Jesu perpetuò caruissent . Derogamus pariter omnibus , & singulis facultatibus , quibus a Præposito generali , aliisque Superioribus vi privilegiorum a Summis Pontificibus obtentorum , donati fuerint , legendi videlicet hæreticorum libros , & alios ab Apostolica Sede proscriptos , & damnatos ; non servandi jejuniorum dies , aut esuriyalibus

cibis in iis non utendi; anteponendi, postponendique horarum canonicarum recitationem, aliisque id genus, quibus in posterum eos uti posse severissime prohibemus; cum mens nobis, animusque sit, ut iidem tamquam Sæculares Presbyteri ad juris communis tramites suam accommodent vivendi rationem.

Vetamus, ne postquam præsentes nostræ litteræ promulgatæ fuerint, ac notæ redditæ, ullus audeat earum executionem suspendere etiam colore, titulo, prætextu cuiusvis petitionis, appellationis, recursus, declarationis, aut consultationis dubiorum, quæ forte oriri possent, alioque quovis prætextu præviso, vel non præviso. Volumus enim ex nunc, & immediate suppressionem, & cassationem universæ prædictæ Societatis, & omnium ejus officiorum suum effectum sortiri, forma, & modo a nobis supra expressis, sub pœna majoris excommunicationis ipso facto incurriendæ nobis, nostrisque successoribus Romanis Pontificibus pro tempore reservatæ adversus quemcumque, qui nostris hisce litteris adimplendis impedimentum, obicem, aut moram apponere præsumperit.

Mandamus insuper, ac in virtute sanctæ obedientiæ præcipimus omnibus & singulis personis Ecclesiasticis, regularibus, sacerdotalibus cujuscumque gradus, dignitatis, qualitatis, & conditionis, & iis signanter, qui usque adhuc Societati fuerunt adscripti, & inter Socios habitii, ne defendere audeant, impugnare, scribere, vel etiam loqui de hujusmodi suppressione, deque ejus causis, & motivis, quemadmodum nec de Societatis instituto, regulis, consti-

# XXVII

stitutionibus, regiminis forma, aliave de re, quæ ad hujusmodi pertinet argumentum absque expressa Romani Pontificis licentia; ac simili modo sub pœna excommunicacionis nobis, ac nostris pro tempore successoribus reservatæ prohibemus omnibus, & singulis, ne hujus suppressionis occasione ullum audeant, multoque minus eos qui Socii fuerunt, injuriis, juriis, contumeliis, aliove contemptus genere, voce, aut scripto, clam, aut palam afficere, ac laceſſere.

Hortamur omnes Christianos Principes, ut ea, qua pollut, vi, auctoritate, & potentia, quam pro sanctæ Romanæ Ecclesiæ defensione, & patrocinio a Deo acceperunt, tum etiam eo, quo in hanc Apostolicam Sedem ducuntur obsequio, & cultu, suam præſtent operam, ac studia, ut hæ nostræ litteræ suum plenissime consequantur effectum, quinimo singulis in iisdem litteris contentis inhærentes similia constituant & promulgent decreta, per quæ omnino caueant, ne dum hæc nostra voluntas executioni tradetur, ulla inter Fideles excitentur jurgia, contentiones & diffidia.

Hortamur denique Christianos omnes, ac per Domini nostri Jesu Christi viscera obsecramur, ut memores sint omnes eundem habere magistrum, qui in cœlis est; eundem omnes Reparatorem, à quo empti sumus pretio magno; eodem omnes lavacro aquæ in verbo vitæ regeneratos esse. & filios Dei cohæredes autem Christi constitutos; eodem Catholicæ doctrinæ, verbique divini pabulo nutritos; omnes demum unum corpus esse in Christo, singulos

# XXVIII

tem alterum alterius membra ; atque idcirco necesse omnino esse, ut omnes communi charitatis vinculo simul Colligati cum omnibus hominibus pacem habeant, ac nemini debeant quidquam, nisi ut invicem diligent, nam qui diligit proximum, legem implevit ; summo prosequentes odio offensiones, simultates, jurgia, insidias, aliaque hujusmodi ab antiquo humani generis hoste excogitata, inventa, & excitata ad Ecclesiam Dei perturbandam, impedierandamque æternam Fidelium felicitatem sub fallacissimo scholarum opinionum, vel etiam Christianæ perfectionis titulo, ac prætextu. Omnes tandem totis viribus contendunt veram, germanamque sibi sapientiam comparare de qua scriptum est per sanctum Jacobum (cap. 3. Epist. Canon. vers. 13.)

„ Quis sapiens, & disciplinatus inter vos ? Ostendat ex „ bona conversatione operationem suam in mansuetudine sa- „ pientiae. Quod si zelum amarum habetis, & contentiones „ sint in cordibus vestris, nolite gloriari, & mendaces „ esse adversus veritatem. Non est enim ista sapientia de „ sursum descendens ; sed terrena, animalis, diabolica. „ Ubi enim zelus, & contentio, ibi in constantia, & omne „ opus pravum. Quæ autem desursum est sapientia, primum „ quidem pudica est, deinde pacifica, modesta, suadibilis, „ bonis consentiens, plena misericordia, & fructibus bonis, „ non judicans, sine æmulatione. Fructus autem justitiae in „ pace seminatur facientibus pacem. „

Præsentes quoque litteras etiam ex eo quod Superiores, & alii religiosi sæpedictæ Societatis, & ceteri quiunque in præmissis interesse habentes, seu habere quomodo libet prætendeント illis non consenserint, nec ad ea vocati, &

au-

## XXIX

auditii fuerint, nullo unquam tempore de subreptionis, ob-  
reptionis, nullitatis, aut invaliditatis vitio, seu intentionis  
nostræ, aut alio quovis defectu etiam quantumvis magno,  
inexcogitato, & substantiali, sive etiam ex eo quod in præ-  
missis seu eorum aliquo solemnitates, & quævis alia servan-  
vanda, & adimplenda servata non fuerint; aut ex quocum-  
que alio capite a jure, vel consuetudine aliqua resultante  
etiam in corpore juris clauso, seu etiam enormis, enormissi-  
mæ, & totalis læsionis, & quovis alio prætextu, occasione,  
vel causa, etiam quantumvis justa, rationabili. & privile-  
giata, etiam tali, quæ ad effectum validitatis præmissorum  
necessario exprimenda foret, notari, impugnari, invalidari,  
retractari, in jus, vel controversiam revocari, aut ad termi-  
nos juris reduci, vel adversus illas restitutionis in integrum  
aperitionis oris, reductionis ad viam, & terminos juris,  
aut aliud quocumque juris, facti gratiæ, vel justitiæ re-  
medium impetrari seu quomodolibet concessio, aut impetra-  
to quempiam uti, seu se juvari in judicio, vel extra illud  
posse; sed easdem præsentes semper, perpetuoque validas;  
firmas, & efficaces existere, & fore, suosque plenarios;  
& integros effectus sortiri, & obtinere, ac per omnes, &  
singulos, ad quos spectat, & quomodolibet spectabit in  
futurum inviolabiliter observari.

Sicque, & non aliter in præmissis omnibus, & sin-  
gulis per quoscumque Judices Ordinarios, & Delegatos  
etiam causarum Palatii Apostolici Auditores, ac S. R. E.  
Cardinales, etiam de Latere Legatos, & Sedis Apostolicæ  
Nuncios, & alios quavis auctoritate, & potestate fungentes  
& functuros in quavis causa, & instantia, sublata eis, &



## XXX



eorum cuilibet quavis aliter judicandi , seu interpretandi facultate , & auctoritate judicari , ac definiri debere , ac irritum , & inane , si secus super his a quoquam quavis auctoritate , scienter vel ignoranter contigerit attentari , decernimus .

Non obstantibus Constitutionibus , & ordinationibus Apostolicis , etiam in Conciliis generalibus editis , & quantum opus sit regula nostra de non tollendo jure quæsito , necnon Sæpedictæ Societatis , illiusque Domorum , Collegiorum , ac Ecclesiarum etiam juramento , confirmatione Apostolica , vel quavis firmitate alia roboratis statutis , & consuetudinibus , privilegiis quoque indulxit , & Litteris Apostolicis eidem Societati , illiusque Superioribus , religiosis , & personis quibuslibet sub quibusvis tenoribus , & formis , ac cum quibusvis etiam derogatorum derogatoriis , aliisque decretis etiam irritantibus , etiam motu simili , etiam si consistorialiter , ac alias quomodolibet concessis , confirmatis , & innovatis . Quibus omnibus , & singulis etiam pro illorum sufficienti derogatione de illis , eorumque totis tenoribus specialis expressa , & individua , ac de verbo ad verbum , non autem per clausulas generales idem importantes mentio , seu quævis alia expressio habenda , aut aliqua alia exquisita forma ad hoc servanda foret , illorum omnium , & singulorum tenores , ac si de verbo ad verbum nihil penitus omisso , & forma in illis tradita observata exprimerentur , & infererentur , præsentibus pro plene , & sufficienter expressis , & insertis habentes , illis alias in suo robore permanens , ad præmissorum effectum specialiter , & expresse dergamus , cæterisque contrariis quibuscumque .

Vo-

# XXXI

Volumus autem , ut præsentium litterarum transsumptis , etiam impressis . manu alicujus Notarii publici subscriptis , & sigillo alicujus personæ in dignitate Ecclesiastica constitutæ munitis , eadem prorsus fides in judicio , & extra , adhibeatur , quæ præsentibus ipsis adhiberetur , si forent exhibitæ , vel ostensæ.

Datum Romæ apud S. Mariam Majorem sub annulo Piscatoris die XXI. Julii MDCCLXXIII, Pontificatus nostri anno quinto.

A Card. Nigronus.

ROMÆ MDCCLXXIII.

---

Ex Typographia Rev. Cam, Apostol.

卷之三

1. *Constitutio* *Imperialis* *ad* *Ubi* *Ubi* *Ubi*  
2. *Constitutio* *Imperialis* *ad* *Ubi* *Ubi* *Ubi*  
3. *Constitutio* *Imperialis* *ad* *Ubi* *Ubi* *Ubi*

aus der Sammlung von Dr. J. C. B. Hirsch und Dr. E. L. Hirsch  
veröffentlicht von Dr. J. C. B. Hirsch und Dr. E. L. Hirsch

Задонскъ възъ

## ЛІКУЮЩІ ЗМІСЯ

John A. and C. H. Bishop Esqrs.